

**Oqaluuserisassanut nassuiaat.**

(Inatsisartut Siulittaasuut)

UPA2016-imut oqaluuserisassatut siunnersuutit, siunnersuutillu oqaluuserisassanngortinneqarsimasut, marsip ulluisa 15-ianni 2016 nassiunneqaqqaarput. Upernaakkut ataatsimiinnermi matumani ullut ataatsimiiffiusussat 35-unissaat naatsorsuutigaarput.

Ullut ataatsimiiffiusut ingerlaavartussaapput, immikkoortut ullumi ataatsimiiffiusumi angumerineqanngitsut ullumi ataatsimiiffiusumi tullermi, taasisoqassappat taasisoqareerpat, siullertut oqaluuserineqartassallutik.

Inatsisartunut ilaasortat, Naalakkersuisut partiillu qinnuigineqarsimapput oqaluuserisassanut oqaaseqaatissaqarunik kissaateqarunilluunniit Siulittaasoqarfimmut saaffiginnissuteqaqqullugit, kingusinnerpaamik ataatsimiinnerup aallartinnissaa sapaatip akunneranik sioqqullugu.

Saaffiginnissutigineqartut Siulittaasoqarfiup oqaluuserisimavai, taakkulu oqaluuserisassani allannguutini ataasiakkaanik kinguneqarsimapput, maanna naatsumik ilisimatitsissutigisassannik.

Kissaateqartoqarnera tunngavigalugu immikkoortut 43 aamma 125, ataatsimut oqaluuserineqartussat, siullermeerneqarnissaat aprilip ulluisa 27-anniit maajip ulluisa 20-annut nuunneqarpoq, taamaattumillu aamma siunnersuutit ataatsimiititaliamut innersuunneqassappata ilalerneqarlutillu aappassaaneerneqarnissaat UKA2016-imi pisariaqassalluni.

Immikkoortut 43 aamma 125 tassaapput:

Immikkoortoq 43: Tusagassiornermik Ilinniarfimmi atuartinneqarnertigut oqaatsitigut piginnaasat qaffassarnissaasa salliutinneqarnissaannut Naalakkersuisut iliuuseqaqqullugit peqquneqarnissaannut Inatsisartut aalajangiiffigisassaattut siunnersuut. Ataatsimut isigalugu kalaallit oqaasiisa atorneqarnerisa ineriartortinneqarnerisalu nukittorsarneqarnissaannut iliuuseqarnissami Tusagassiornermik Ilinniarfimmi ilinniarsimasut oqaatsitigut piginnaasaasa qaffatsinnissaat qulakkeerneqassaaq.

Immikkkoortoq 125: Inatsisartut aalajangiiffigisassaattut siunnersuut, tamatumuuna Naalakkersuisut peqquneqassasut sulissutigissallugu, nunatsinni tusagassiorfinni kalaallisut oqaatsitta atorluarneqarnerulernissaat.

Ilanngullugu oqaatigineqassaaq Inatsisartunut ilaasortat ataasiakkaat Naalakkersuisullu siunnersuutit saqqummiunneqartut kalaallisut qallunaatullu eqqortumik oqaasertalerneqarsimanissaat namminneq akisussaaffigimmassuk. Oqaasertaliussanik erseqqissaasoqarnissaa kissaatigineqarpat taakku Allattoqarfimmut nassiuteqquneqarput UPA16-imi siunnersuutip oqaluuserineqarnissaa sioqqulluarlugu.

Suleriaasitsinni § 4, imm. 1 naapertorlugu oqaluuserisassanut nassuiaat isumaqatigiinniutigineqarneq ajorpoq, oqaluuserisassallu pillugit naammagittaalliutit allakkatigut siulittaasoqarfimmut ingerlatinneqartassallutik.

Imm. 4, ataatsimiititalianut ilaasortassanik qinersineq, ullumi oqaluuserineqartussaagaluaq apriiilip ulluisa aqqarngannut kinguarinneqarpoq.

Taamaalilluni oqaluuserisassat akuerineqartutut isigineqarput.

Ilaasortat uku akornanni taasisarnerit pillugit isumaqatigiissuteqartoqarpoq:  
Anders Olsen, Siumut og Mimi Karlsen, Inuit Ataqatigiit,  
Vivian Motzfeldt, Siumut og Peter Olsen, Inuit Ataqatigiit.